

Meeqqat atuarfianni klassimi ataatsimi atuartut amerlanerpaajugunik 18-unissaannik qulakkeerinninnissamik inatsisiliornissap qanoq isumassarsiatsialaatigineranik oqallinnissamut siunnersuut.

(Inatsisartuni ilaasortaq Jørgen Rosbach, Demokraatit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut oqallinnissamut siunnersuut qujassutigaa siunnersuuteqartullu meeqqat atuarfianni klassini atuartut amerlanerpaaffissaasa appartinneqarnissaannik isumaliutaa akueralugu, aammalu atuartut ilinniagaqarnikkut atugarissaarnikkullu atugaasa isumaliutigineqarnerat pitsaasutut isigalugu. Meeqqat atuarfiat inuiaqatigiit tunngavigaat, Naalakkersuisullu meeqqat tamarmik ilinniakkamikkut ineriartornissaminnut inooqataanikkullu atugarissaarnissaminnut piginnaasaqarfeqareernissaminnut pitsaanerpaanik periarfissaqarnissaat isumaqatigalugu.

Klassimi atuartut assersuutigalugu 18-inik amerlanerpaaffeqarnissaannik killiliinerup oqallisigineqarnerani eqqaamassavarput nunami tamarmi atuartut klassini amerlassusii allanngorartorujussuummata. Atuarfinni amerlasuuni klassit 18-it inorlugit atuortoqartut pioreerput, unamminartulli pingaartumik illoqarfinni annerni naammattuugassaapput – minnerunngitsumik Nuummi, illoqarfimmimi tassani klassit affaat sinnerlugit 18-it sinnerlugit atuortoqarput. Assigiittumik qaffasinnerpaaffissaq, nunami sumi najugaqarneq apeqqutaatillugu, assigiinngitsorujussuarnik kinguneqartussaavoq.

Tamatununga peqatigitillugu ilinniartitsisut ilinniarsimasut amigaataanerat annertuunik unammilligassaqarfigaarput. Tamanut atuuttumik atuartut 18-inut ikililerneqarpata klassit nutaat 53-it pilersittussaassavagut, ilinniartitsisut ukiumut atorfi 69-it inulaarlugit amerlassusillit pisariaqartilissavagut aammalu kommunit ukiumut 34 millioner kroonit missaannik aningaasartuuteqarnerulissapput. Tamatuma erseqqarissumik takutippaa, atuartut ikinnerulernissaannik kissaateqarneq atorfinitsitsinissamut, aningaasaqarnermut atuarfiullu illuutai eqqarsaatigalugit oqimaalutarneqartariaqartoq.

Naalakkersuisut taakkuninnga tunngavilersuuteqarlutik isumaqarput, klassini atuartut amerlassusiisa qummut killigisa appartinnissaannut ineriartorneq arriitsumik ingerlanneqartariaqartoq, aammalu tamanna pisariaqartitsiffiusut aallaavigalugit ingerlanneqassasoq, nunamut tamarmut ataatsikkut atuuttumik inatsisiliorneq aqutiginagu. Taamatut iliornikkut perorsaanikkut anguniakkat ulluinnarnilu pissutsit atuuttut eqqarsaatigalugit aqqiissuteqarsinnaavugut.

Naalakkersuisut meeqqat atuarfiat pillugu naliliinissami tulliuttumi (Ilinniartitsinermut periusissiaq 2024-2030) pissutsinut allanut, soorlu atuartitsinerup pitsaassusaanut, specialpædagogikkimi neqeroorutinut aammalu ilinniartitsisut piginnaasaqarfiinut, ilagitillugu klassimi atuartut amerlanerpaaffeqarnissaannik apeqqut misissorumarpaat. Taamatut

suleriuseqarnikkut klassit angissusissaat pillugu patajaatsumik tunngaveqarluni aammalu perorsaanermi ulluinnarnilu atukkat eqqarsaatigalugit aalajangiisoqarsinnaavoq.

Naggataatigut erseqqissaatigerusuppara, Naalakkersuisut meeqqat atuarfianni ilikkariartornermi atugarissaarnermilu atugassarititaasut pitsanngorsarneqarnissaannik kissaateqarneq isumaqatigimmassuk. Naalakkersuisut aaqqiissutit klassit mikinerit perorsaanikkut iluaqutissartaannik akuersaarfiusut, tamatumunngalu peqatigitillugu sulisoqarniarnermut, aningaasarsiornermut illuuteqarnermullu tunngasunik isumaliutiginniffiusut, sulissutiginiarpaat.

Naalakkersuisut taakkuninnga oqaaseqaateqarlutik inersuarmi oqallinnissaq pissanganarteq anguniagaqarfiusorlu qilanaaraat.